

# Seminar EvaR2018 mantapkan pentaksiran, PdPc mahasiswa

info

→ 174 peserta  
→ Peserta dari Universiti Putra Malaysia (UPM) dan Universiti Negeri Yogyakarta (UNY).

➔ Sesi perkongsian maklumat antara UPM, UNY dalam bidang pendidikan

Oleh Ridzuan Yop  
yop@bh.com.my

✦ Serdang

**B**agi merealisasikan Pelan Transformasi Pendidikan Negara (2013-2025), mahasiswa harus peka dengan arus perubahan pentaksiran dan penerapan kemahiran berfikir aras tinggi (KBAT) dalam penilaian pendidikan masa kini.

Pengarah program *Seminar Educational Evaluation and Research 2018 (Eva-R2018)*, Dr Siti Salina Mustakim ber-

kata, pendekatan itu selari dengan pembangunan Revolusi Perindustrian 4.0 yang memfokuskan elemen Pembelajaran Abad ke-21 (PAK-21), inovasi dalam pendidikan, perubahan reka bentuk bilik darjah, dan pengajaran dan pemudahcaraan (PdPc) terkini.

Beliau berkata, arus perubahan penilaian ini memerlukan kesungguhan dan penelitian yang lebih meluas melalui pengurusan Pentaksiran Autentik dan Pentaksiran Alternatif dalam kalangan pendidik.

"Penganjuran seminar bertemakan pentaksiran dalam pendidikan ini berlangsung seiring dengan lawatan mahasiswa Program Penyelidikan Pendidikan dan Pentaksiran, Universiti Negeri Yogyakarta (UNY), Indonesia," katanya.

Beliau berkata demikian ketika berucap pada majlis perasmian Seminar EvaR2018 yang berlangsung di Fakulti Pengajian Pendidikan (FPP), Universiti Putra Malaysia

(UPM), di sini, baru-baru ini. Majlis perasmian seminar anjuran Jabatan Asas Pendidikan (JAP) FPP, UPM itu disempurnakan Timbalan Dekan Akademik FPP, Prof Dr Aminudin Yusof.

Yang turut hadir Ketua JAP FPP, Prof Madya Dr Ahmad Fauzi Ayub.

## Kemajuan sejagat

Prof Aminudin Yusof dalam ucapannya berharap jalinan kerjasama dan pembabitian kedua-dua universiti akan dimeterai dengan sempurna.

"Kita (UPM & UNY) mampu untuk menjadi penyumbang kepada transformasi pendidikan yang berlaku di kedua-dua negara, melalui jaringan antarabangsa.

"Perkara asas yang utama bukan saja untuk mahasiswa memperoleh ilmu pengetahuan, tetapi kemahiran untuk menghadapi kehidupan sebenar dengan peluang dan cabaran era masa kini," katanya.

Sementara itu, Dr Ahmad Fauzi berkata, inisiatif itu



Prof Aminudin (tengah) bergambar bersama-sama peserta Seminar EvaR2018 di UPM, baru-baru ini.

dapat merealisasikan visi dan misi UPM ke arah membentuk kekayaan pembangunan negara, kemajuan manusia sejagat menerusi penerokaan serta penyebaran ilmu.

"Seminar ini juga berjaya

mencapai matlamat untuk mewujudkan jaringan lebih luas sebagai rakan strategik bagi inisiatif baharu dalam amalan PdPc serta penyelidikan, khususnya dalam bidang pendidikan.

"Walaupun seminar ini,

baharu pertama kali dilaksanakan, kita (JAP) berjaya menarik minat peserta dengan menjalankan sesi perkongsian maklumat antara dua negara (UPM dan UNY) dalam bidang pentaksiran," katanya di sini.